


Nov' exposiziun en la Villa Garbald

Sonda passada ha già lieu en la Villa Garbald a Castasegna la vernissascha da la pli nova exposiziun cun il titel Iconas. *Ester Vonplon* preschenta fotografias ord l'archiv da maletgs da l'Institut d'istorgia d'art da l'Universitad da Turitg. Dapi l'onn 2005 dovra il Museum d'art dal Grischun la Villa Garbald a Castasegna sco filiala per dar novs impuls en il lavuratori d'ideas Villa Garbald. Per quel scopo ha l'artista Ester Vonplon retschertgà en l'archiv da maletgs da l'Institut d'istorgia d'art da l'Universitad da Turitg e chattà in stgazi grondius: ina collecziun da plattas da vaider veglias cun fotografias da capodovras da l'istorgia da la pictura europeica. Ils diapositivs da vaider èn perditgas istoricas da l'istorgia da la fotografia. Las fotografias en alv e nair, ch'eran vegnidas coluradas durant lez temp, èn d'ina coluraziun sorprendenta. Ester Vonplon, cun ses interess per l'istorgia da la fotografia e cun gronda mirvegla per las midadas dals maletgs, ha mess ensemen ina exposiziun fascinanta. Quella è anc averta enfin ils 27 da zercladur 2026. (cdm/fmr)



Ina da las ovras expostas en la Villa Garbald a Castasegna: La platta da vaider cun si la fotografia colurada ed il purtret original «Pierrot» da l'artist Jean-Antoine Watteau.

FOTO VILLA GARBALD